

1 JON

Jonin ti kamim Jisis siya niisiisimauuim simiir nwir ieya. Ti Jonin saisakinairgin biya Jisisni yai win kibiyim sim niki winkiyin simiir nanaakninkiiyam. Mi biigibiyan yokwowa Jon siya winkiya ya iikamim naingwo tibmiiyim simiir boinkika sima, simiir naingwo tibmiiya pi sibgu onkwokripkaiyim ta yaiya yipika Jon siir nhwokinhwokar kiga mi siir wiingwiingar mi wakaeya Jisis siirim. Siya simiirin min boinkikin sima iki kamim niksisaeyim sima boinmimauuim dimin taeminim Jisis siir yayim simiir hiriinan nwo karam nwowim simiirsi mintirao. Siya simiirin ti hiniina boinkikin, sima ti nuan siyupai siyupaiyim simiiram kipi naingwokwo sima irni nwirnyam naingwokwonanaeya Jisis siya hauua sair hiriinan daingwokwonanae. Iriig.

Yaiyim krimiir whinkinsiis haiginiuwiyim inigak krima nwoyokiyokiikaeyamam sima

1 ¹Ta yokwowa krima winkika Jisis Krai siir, yipiki krima dapiyin Yai. Biigi biyarin Krai siya ha nwokin mi siyairgin kwoinbudin omwaiwaiyayokiyokiiyin siir bwamkibwamin. Mi tariinanin krima siir bidi wakaeyim mi siirin krimaki krimar kigin mi siirin krimiir iingar nonkwokiugin. ²Mi kwoinbudin omwaiwaiyayokiyokiiyin siir bwamkibwamin ini siyar ywowiskiyin mi iya siya nita krima siir bidiyar kigim mi tariinanin krima siirin kimiir asi boinmimauuwi. Ti inkam nwiruan yipiki inokiiinokin hiriyar nwowiyin. Biya siya Adi Komii krimiir Wanin saika niki okin mi ini siyar yanaakninkiibudgiyin. ³Dimin taeminim krima kigim yim ti sima krima boinmimauuwim kimiir mi ta hiriinan sairsika kima wi iripa asi nongwomamaii krimiir hiriinan ta krima nwowiya Adi Komii saika mi siir yinisim ieya Jisis Krai sair hiriinan mi nim krima ini kwoin whiruar ywowiskiyim. ⁴Mi krima ta yokwowa kimiiram hiriinanam winkika kima wi nwoki sibgu inokninkinim ti dimin taeminim simiirin mi kima mi krima, krimiir kwoinim wi maigimairga niki owim. Iriig.

**Krima Adi Komii krimiir wanin, siir dimin kibi
kibiyim simiirrarar wakaeyokna ap**

⁵Ti yayim Kraisi siya boinmimauuim krimiir mi nim krma tisi kimiir swoki kwaboinmamauuim. Adi Komii krimiir Wanin siya ini bienan ywowin siya nii wara bi swoki ominominikin. ⁶Mi krma ti hiniina boini siya mi krma ini kwoin whiruwar ywowim mi krma dimin biye tiri, nim wi niibwomambwo napririri, nim krma pi niksisaekim mi krma Adi Komii siir yai kibikikibiya sair bi wakaeyokna apkim nim siyu bibiyeyim dimin biye tiriyim simiir napkim. ⁷Mi krma ti siyu kibikikibiya Adi Komii siya nwowiyin siirgisiir nwowi mi krma wi iripar nongwomamair aekiyami siir nhieya sair kirieni mi ta nhieya yipiki siir yinisim iira Jisis naokiinainiya iya siya naonama mi ti dimin biye biyeyim krma tirim yim siya simiirin wi hiriayar haiyoprimdiyumiyyokiyokiyami mi krimiir kwoinim ini rirmiirirmiyar ywokiym.

⁸Mi krma ha boini nim krma dimin biye whirmin whirmin karamaeka, nim krma, krma krimar swoki priiyiksasaena mi Adi Komii siir yai kibi kibiyim yim wi krimiir kwoinaw haigi okai rani. ⁹Mi ti dimin biye biyeyim krma tirim simiir boininkii. Dimusi rani, Adi Komiiyin dimin whirki bi kimbugin mi siya ta nimbini aiar nonkworinukripkaiyim dimin biye biyeyim wi siya haiyoprimdiyumiigi mi krimiir kwoinim wi rirmiirirmiya nwokii. ¹⁰Mi krma hiniina boini nim krma dimin biye bi tirkim mi krma Adi Komii siirin wi hiniina boini, Adi Komii siya niksisaeyan inkamkin. Dimusi rani, ombud komiiyin dimin biye kina bidi tirim. Iriig.

**Kraisin, inkamin dimin whirki kimbu karamae
nwowin krimiirin siya whinkinsiis haiginiugin**

2 ¹Ti kariir nomiiyauim kara naingwokwonanaeyim, kara ti yayim kimiiram winkikim mi ta hiriinan sairsika kima dimin biye painisi tirsi. Mi krimiir nwirki dimin biye tiri, nim krma Jisis Kraiskakaigim ti inkamin dimin whirki kimbu karamae nwowin siirin wi siyar whinkinsiis haiginiuwu. Siya wi Adi Komii siiram asi sriigi wi krimiirsi sriigii. ²Yio Jisis Kraisi sasairgin yipiki bidi bidiniya sasair ninkin imiiaenan Adi Komii krimiir Wanin siir ti dimin biye biyeyim simiirsi siirgisiir nhie aiar mi ti io kwoin Adi Komii siya naingwowyin krimiiram yio siya bidi yikripkiyin. Dimusi rani, dimin biye biyeyim krma tirim siya ti hiriinan simiirsi naokin simiir haiyoprimdiyumiigiyim. Yio krimiir dimin biye biyeyim simiirara rani. Niingaka. Siya iki iikam whiekakim hinda tindanim simiir dimin biyeyim simiir warar haiyoprimdiyumiigikim.

³Mi krma siir yai imiir sibgu wakaeyokna api mi krma siirin wi haniingin sibgu ninokninkini. ⁴Mi inkam nwirin ha boini, mi kara Adi Komii siirin ina sibgu inokninkinin mi siya yai imiir wakaeyokna ap karamae nrowi mi ti inkam hiriinanin yipi pi niksisaekin mi Adi Komii siir yayim yim siir kwoin hir wara nwokai rani. ⁵Mi tiriiginim yipiki inokninkin Adi Komii siir yai aiiram naingwowyim yim sima ina ninokninkinim siyiuin siiram naingwokwonanaeyin siyiumwokisiyiumwoin. Mi ta hiriinan saeya krma sibgu dinokninkin nim krma Adi Komii saika bidi yamasum. ⁶Mi yipiki ha boini yio siya Adi Komii saika bidi yamasuwin mi siya wi dimin taeminim biya Kraisi siya tirim wi simiir hiriinanar timi tir. Iriig.

**Mi yipiki siir nomiiyauwam naingwokwonanaeyin
yio Adi Komii siir yai imiir wakaeyokna apikin**

⁷Mi ti kariir nomiiyauim kara naingwokwonanaeyim, ti yayim kara winkiyim kimiiram hiniin kima wi paniin paniina nrowi yim yai win tani. Kima simiir bidiyar iki wakaeyim iya kima biigibii Adi Komii krimiir Wanin siiram naingwo tibmii kiina. ⁸Mi ti yayim ti kara winkiyim kimiiram yim yai winkim. Mi iikamim yipiki ti miyim Jisis Kraisi siya miriiyim simiir kigim mi ti kima mirii ikim mi sima wi haini ninokninkini taka yayi ya yai kaimwowaiga. Mi yim ti yayim yim hiniina boinkim, krma krimiir nomiiyauim simiiram naingwokwonanae. Dimusi rani, krma ini ti yai imiir wakaeyokna apim mi ti dimin biyeyim ti iikami kwoinaw nwoyaiyim niibwomambunan yim wi simbi kinimnisainami mi simiir maeyauwa wi ti dimin kibiyim paenan niyaeiyim wi sima kisina okainaowidi. Jisis Kraisi siyairgin bwamkibwamin paenan krimiir niyua haiginiuwiyin.

⁹Mi yipiki ha boini, yio siya Adi Komii siir yai imiir wakaeyokna apikin mi siya io pi siir nomiiyau inaka swoki owi mi yio hiriinan inkamin yio Adi Komii siir yai imiir bi wakaeyokna apikin. Yio ini inkamin niyaka napamwiiiyin siyiu si sikwo pae min niririya apnam karamae nrowiyin ini siir hiriinan ywowin. ¹⁰Mi yipiki siir nomiiyau iiram naingwokwonanae mi Adi Komii siir yai imiir wakaeyokna api, yio ini inkamin siyiu nabe kigimok apiyin ini siir hiriinan ywowin mi yio siya siyiu iirin ina sibgu kigimok apin mi siya wi niigikiyamyao akai rani. ¹¹Mi yipiki siir nomiiyau inaka nrowi io mi yio tari Adi Komii siir dimin taemin bi ninokninkin. Yio dimin biye biyeyim simiir wakaeyokna apikin inkamin yipiki siyiu si napamwiiiyin niyaka si hiniin. Mi siir nhwo iirin ni aeya nimui mi ta hiriinan sairsika siya paniisi kigimok api siyiu iirin.

¹²Ti kariir nomiiyauim kara naingwokwonanaeyim, ta yokwo kara winkiya kara dimusi bi winkikin wari dimin biye biyeyim kima tirim

simiirsi winkika simiirin Adi Komii siya bidi haiyoprindiyumiigiyim. Simiirin siya bidi haiyoprindiyumiigiyim. Dimusi rani, dimin kibi kibiyim biiya Kraisi siya tirim simiirsika. ¹³Kima ti adim, kara ta yokwowa kimiiram winkika. Dimusi rani, wim kima siirin ina ninokninkinin yipiki biiya omwaiyar niki waiyayokiyokiiyin mi tariinanar nadigniyin siiramin. Kara yokwowa yainan whrwanim nonkwona karamae nwowim kimiiram winkika. Dimusi rani, Adi Komii siir yaiya wi kimiir kwoin waraurar niki okaiyokiyokiiyin mi kima wi Setan siir nwoki ikwowaisiiyim. ¹⁴Kara yokwowa yainan whran kimiiram winkika. Dimusi rani, wim kima ini kirie hiriyar nwokripkaiyim mi Adi Komii siir yaiya ini ini haniin kimiir kwoinan kwirii idwokaiya mi kima Setan siir bidi ikwowaisiigim. Kara yokwowa ad imiiram winkika. Dimusi rani, wim kima ina ninokninkinim yipikim omwai hiriyar waiyayokiyokiiyin mi ini tariinanar yadigniyin.

¹⁵Mi kima dimin biyie biyeyim iikamim sima tiriyim ti nu iiranim simiiram kipi naingwo simiir wakaeyokna apam. Mi yipiki ti nuan dimin taeminim simiiram naingwowi mi yo tari Adi Komii siiram naingwokwo rani. ¹⁶Mi dimin taeminim nuanim yim hiniingim, mi ti dimin taeminim ti sima kigim sima iinokiinokin simiir haiyamar mini mi dimin biyeyim simiiramar mi kigmairi mi siya iki siir inig iirar hainanaeyim mipi ha boini, kara digworaekwoki naokingugunankaigin ini iki iikam nhirim simiir haiburin. Mi yim digworaekwowim yim Adi Komii siir tani. Niingaka. ¹⁷Mi dimin taeminim ti nuin siirim mi dimin taeminim kigmairi ikim yim wi simbi digii mi yipiki dimin taeminim Adi Komii siya naingwowim simiir wakaeyokna api yim wi hiriyar nokwoyokiyokiiyami. Iriig.

Krais siir sau omomim yim wi sima simar niisiimaunaei

¹⁸Ti kariir nomiiyauim, iiya ti nu ieya digiyana ya kingiin bidi yitkiya. Mi wim kima ta yai aiirin bidiyar yinokninkinim hiniin Jisis Kraisi siir sau omomin wi paniin paniina nimbiyami. Mi Jisis Kraisi siir sau omom whiekakim yim bidi yitim mi yim sima simar bidi yanaakninkinam mi nim krima ta ii aiirin ina ninokninkinim ya ini kingiin nwowa. ¹⁹Dimusi rani, ti kamim yipiki Jisis Kraisi siir sauan omom win nwowim yim sima iripa kwoin krimaka nwo rani, yipiki Jisis Kraisi siiram naingwo tibmii kiiniyim, yim sima krimiir bidi haiburgigim. Mi sima iripa kwoin krimaka nwokiswo mi sima pi iripa krimakar pi ywowin. Mi sima krimiir bidi haiburgigim mi ta hiriinan saiirsika nim krima ta saiirin bidiyar yinokninkin kiinim, simiir nwirki iripa kwoin krimaka bi swoki okim. Niingaka.

²⁰Adi Komii siir naeyuin ha nitin ini haniin kimiir kwoin imiir ini kwirii idwokaini mi ta hiriinan saiirsika, kima ti dimin taeminim simiir

dimin mwokimwoim simiir asi sibgu ninomokninkini. ²¹Kara ta yokwowa kimiiram ha bi win boinkikin, wim kima Adi Komii siir dimin taemin mwokimwoim simiir bi ninokninkin. Niingaka. Wim kima simiirin bidiyar yinokninkinim. Mi ti digworaekwowim yipiki kaimwo nwowim mi ti digworaekwowim yipiki kaimwo nwo karam nwo ikim wim kima simiirin bidiyar yinokninkin digim. Mi kima ti niksisaeyaiyim yipiki yaimwokiyaimwoim simiir niinikikrimkripiyim simiirin ina mi inokninkinim.

²²Mi yipiki niksisaeyin? Mi ti inkamin yipiki ha boiniyin Jisisin yio Krais rani mi ti hiriinan inkamin Adi Komii siya nimbingii mi siya siirin wa nikropkii. Mi yio ti inkamin yio Jisis siir sau omomkin. Mi Adi Komii siya mi siir yinisim ieya sowiirniiyin digiumii bi haimriiyugigo. ²³Mi ti iikam hiriinan yipiki Jisis Krais siir miisisaeyim mi yim sima iriipi hiriinan Adi Komii siir warar mi miisisaeyi simiir Adin. Mi ti iikamim yipiki Jisis Krais siir haiyim mi yim sima iriipi hiriinan Adi Komii siir warar mi inkin haigim simiir Adin. Iriig.

Adi Komii siir naeyiuin krimiirin siya niisiimaugin yai miyik

²⁴Mi ta hiriinan sairsika kima wi kimasiyar mintiraona. Mi yai kibiya yipiki biigibii kimar wakaeya, ya kimiir kwoinau waraurar haiginonkworinukripkai. Mi kima ti hiriinan tiri mi kima wi kwoin whiruwa Adi Komii siya mi siir yinisim ieya wi sowakaniiyar nwowi. ²⁵Mi yim tiriiginim yim sima Jisis Krais siya nimbingiyim krimiiram krime haiyim. Siya krimiir whinkinsis haiginiuwam nimbingikin mi krime wi Adi Komii saika nwoiki sibgu oyokiyokikaeyamim.

²⁶Kara ta yokwowa kimiiram winkika kimiir boinworwokaigiyim ti dimin taeminim yipiki ti iikam ima naingwowiyim kimiir niksisaeyam. ²⁷Mi Jisis Krais siya siir naeyiuin kimiir bidi hauugiyin mi ta hiriinan sairsika siya kimiir asi whinkinsis haiginiuwi. Mi ti naeyiuin kimiir kwoinau waraurar nwokaikripkaii mi kima wi inkam nwiram noksir tani kimiir nowomwarkaiyuwamin. Mi ti naeyiuin kimiirin wi siyar nowomwarkaiyuwi dimin taemin whiekakim. Mi ti dimin taeminim wi siya nowomwarkaiyuwi, yim niksisaeyi dimin tani yim kaimwowaigim. Mi yim wi ti hiniina nwowi, kima ta Adi Komii siir naeyiuin siir yai aiir wakaeyoknaei, wim wi Jisis Krais saika namasukikini.

²⁸Ihi, ti kariir nomiiyauim, kima Jisis Krais saika damasukikin. Mi kima ti hiriinan tiri mi iya siya swoki iti nua tiriir mi nim krime wi maingimaarga nwowini siir kigamin, krime wi nididwin tani mi wi mi agwoprakai rani. ²⁹Wim kima bidiyar yinokninkinim Adi Komii siya bimbiiwi rani mi yipiki dimin miyik tiri mi kima wa ninokninkini siya siir yinisimkin. Iriig.

Tariinanin krime ini Adi Komii siir yinisim nwowim

3 ¹Kima whiekakarim ta sair wakaeki, Adi Komii krimiir Wanin siya krimiiram nhami nhami naingwokwo rani mi ta hiriinan

saiirsika siya krimiirin siir yinisim asi nikiugim. Yim ti yayim yim kaimwowaigim. Nim krma siir yinisisimkim. Mi iikamim yipiki ti nuan siyu imiir wakaeyokna apninkiniubumbunaniyim mi ti tariinanar nadigniyim yim Adi Komii siir bi ninokninkinkim. Mi ta hiriinan aeya sima ti dimin taeminim krma wakaeyokna apiyim simiir paniisi yinokninkinsi. ²Ti kariir nomiiyauim kara naingwokwonanaeyim, nim krma Adi Komii siir yinisisimkim. Mi krma sibgu ninokninkin tani mhoyia krma wi paniin paniina namisi owi. Mi Adi Komii siya ti dimin hiriinanin krimiir bi niki iisimauugin. Mi ti diminin sasaigin krma sibgu inokninkinin Jisis Kraiis siir, yio hiniingin siya wi sipi swoki iunaiini mi krma wi siirar kigwini mi iya krma siir kigwini mi nim wa ninkpit iuguskii mi wi siir hiriinanar namwowiwi. ³Mi yipiki ti dimin taeminim nimbiiyamanim simiiram nwokwokini mi yim sima wi hirihiiriyyar boininaei dimin biye karamaeka mi sima wi dimin whirki kimbu karamaeyar nrowi Kraiis siya nwowa dimin whirki kimbu karamae siir hiriinan.

⁴Dimin biyieya sair bwamkibwamin Adi Komii siir siyu komii siir yayia siyar kwiinakibiiri. Mi ta hiriinan saiirsika ti iikamim dimin biyieki naokingugunankaiyim sima Adi siir siyu komii siir yayim simiir asi niinakrimkripi. ⁵Mi kima ina ninokninkinkinim ta Jisis Kraiis siya niunaiiniya nua tiriir iikam simiir dimin biye biyeyim simiir haiyoprimdiyumiigiyam siya dimin biye whirmin whirmin bi swoki tirmintirminkin mi siya ti hiriinan tiramar mi aingwokin. ⁶Mi ta hiriinan saiirsika, tiki iikam whiekakim yipiki Jisis Kraiis saika namasukikinim yim sima inokinokin dimin biye bi tirkim. Mi ti iikamim yipiki inokinokin dimin biye biyieya tirnanaeyim mi simiir kwoinim Kraiis siiram naingwo karamae nrowiyim yim siirim bi wakaeyokna apikim.

⁷Ti kariir nomiiyauim, kima iikamim simiiram kipi kiwaki kimiir niksisaeyim. Mi yipiki siyu miyikimiyikni nrowi mi yio sikisiya inkamin. Dimusi rani, Adi Komii siya krimiirin ha kigi nim krma dimin whirki bi kimbugim Jisis Kraiis siir hiriinan dimin whirki kimbu karamae siya nwowa sair hiriinan. ⁸Mi yipiki dimin biyeyim simiirsimiira tirnanaei mi yio tari Setanikin. Biya mi tariinanin iriipi hiriinan Setan siya ini dimin biyeyar tirkripkaiyin. Mi tiriiginim yipiki dimin biyeyim simiir simiira tirnanaeyim yim siir iikamkim. Mi Adi Komii siir yinisimin siya nitin ti nu iir siya dimusi bi nitkin siya Setan siir miyim simiir diguskiyam nitkin.

⁹Mi yipiki Adi Komii siir yinisim nrowi mi yio tari siir naeyiu iir bidi haiyin. Mi ta hiriinan saiirsika, siya dimin biye paniisi tiryokiyokiyamsi. Niingaka. ¹⁰Mi ti hiriinan siyiuin, nim krma ina ninokninkinim yipiki Adi Komii siir yinisimin mi yipiki Setani yinisimin.

Mi yipiki dimin biyeyim simiir simiira tirnanaei mi yio tari Adi Komii siir yinisim tani. Mi yipiki siir nomiiyau iiram naingwokwonanaei karamae nwowiyin mi yio Adi Komii siir yinisim tani. Iriig.

Kima kimiir nomiiyauim simiiram daingwokwonanaei

¹¹Mi ti yayim yipiki biigi bii kimar wakaeyim, kima siir yai aiirin hiniina wakaekim krima irni nwirniyam daingwokwonanaei, ¹²mi krima io whwonkam kipi nanao ti inkamin Ken nikiuwiyin siir hiriinan yio siya Setan siirgin mi yio siya siir nomousim iir asi nisomaokin. Mi siya siir dimusi nisomaokin? Siya siirin minsi nisomaokikin, dimin taeminim siya tirim yim miyik rani mi dimin taeminim siir nomousim ieya tirim yim wadiekim. Mi siya siirin io ha nwowin mi siya siirin ina yisomaokiyin.

¹³Kima mouni haniin kipi siinkaoki. Dimusi rani, iikamim yipiki Adi Komii siir wakaeyokna ap karamae nwowiyim yim sima kimaka whwokwoka nwo rani. ¹⁴Mi krima krimiir nomiiyau imiiram naingwokwonanaei mi krima wi haini ninokninkini krima dimin biyeyim simiir wakaeyokna ap rani mi hiriinankiniuwi, krimiir kwoinim yim wi paeki niu rani. Mi krimiir kwoinin yio wi pi ninkpitkii mi wi omwaiyar swoki waiyai mi siya wi Adi Komii saika nwoyokiyokiikaeyami Mi yipiki siir nomiiyau iiram naingwokwo karam nwowi mi yio tari dimin biyeyim simiir wakaeyokna apikin mi siir kwoinin yio bidi yaowigusamin siya Adi Komii siir dimin taeminim simiir naingwoyiskai rani. ¹⁵Mi yipiki io whwonkam siir nomiiyau iir nanaowi mi yio ini inkamin iikam nisomsomaokaowiyin ini siir hiriinan ywowin. Kima ina ninokninkinim ti inkam hiriinanin yio siir kwoinin bidi yaowin mi yio siya Adi Komii siir dimin taeminim sim whir wara swoki aingwoyiskai rani. Mi siya wi saika nwoyokiyokiikaeyam tani. ¹⁶Biiya Jisis siya krimiirsi naokin mi ti hiriinan siyuin siya krimiir min niisiimauugin iikam nhirmiyam siya naingwokwonanaeiya sair bwamkibwam iir. Krima ti dimin taeminim Jisis siya tirim simiirarar tir. Krima krimiir nomiiyauim simiiram daingwokwonanaei mi krima naosi kipi nidid simiir whinkinsiis haiginiusiyin. ¹⁷Mi yipiki siir nu iirar nwowi mi siya digworaekwoki naokingugunankai mi ha ninokninkini siir nomiiyauin yio dimin karamaeka mi siir mwoin nikrimkrae karamae nwowi mi siya ha boini siya siirin wi dimin sim whir swoki hauu rani mi Adi Komii siir naingwokwonanaeya wi paniina haigiprakai siir kwoinauin? Sima wi dig nwo rani! ¹⁸Ti kariir nomiiyauim kara naingwokwonanaeyim, krima yayim naekak nwo karam nwowiyim simiirin hinda kipi priiboin priiboin mi hiniina kipi mi boin, nim krima iikam imiiramar naingwokwonanaeikim. Krima simiir whinkinsiis haiginiu mi simiir diisiimauu hiniin, krima simiiramin nhaminhami naingwokwonanae rani. Iriig.

**Iikamim yipiki Adi Komii siir yai aiir wakaeyokna apiyim
yim sima siir whwonkam idan wi nididgaa nwo rani**

¹⁹Mi ti hiriinan siyiun, nim krīma wa nwoke inokninkinim hiniin nim krīma Adi Komii siirgim yipiki dimin mwokinwoim simiir bwamkibwamin. Mi ti hiriinan siyiun, krīmiir kwoinim wi nidid rani, krīma Adi Komii siir whwonkam ida nokwowi. ²⁰Mi krīmiir kwoinim sima krīmiirin hiniina boini, nim krīma dimin biyie bīdi tirim. Dimusi rani, Adi Komii siya dimin taemin imiirin ina ninomokninkin digin mi krīmiir dimin biyie biyeyim yim wi siya haiyoprimdiyumiigii mi krīma wi simiirsi nidid rani mi siya ti dimin taemin imiirin whirminwhirmin bi nokpaokiiḡin, siya simiirin ina ninomokninkin digin. Mi ti dimin taeminim krīma ninokninkin karamae nwoke, windi yio siya ina ninokninkin. ²¹Ti kariir nomiiyauim kara naingwokwonanaeyim mi krīmiir kwoinim sima krīmiirin hiniina boinmauu karamae nwoke, krīma miyik rani mi iya krīma Adi Komii siir whwonkam ida nokwowi mi krīmiir kwoinim wi kirie hiriyar nwokripkaii. ²²Mi krīma Adi Komii siiramim diminam srii mi siya krīmiirin wa hauwi. Dimusi rani, nim krīma yai imiir wakaeyokna apkim mi krīma dimin miyik miyikim siya naingwowim krīma tiram krīma simiir tirkim. ²³Biiya Adi Komii siya ti yayim krīmiir bidiyar iki boinmauuim. Krīma siir yinisimin Jisis Kraiis siir wakaeyokna ap mi irni nwirniyam dinan aingwokwo. ²⁴Mi yipiki Adi Komii krīmiir Wanin siir yai imiirarar wakaeyokna api, siya mi Adi Komii siya sowa wi kwoin whiruwa nwoke mi siir naeyiun yio Adi Komii siya hauugiyin krīmiir, ti Adi Komiiyin siya ini krīmiir kwoinawu tir kwirii idwokaiyin mi ta hiriinan sairsika nim krīma ina mi inokninkinim nim krīma ini kwoin whiruwa saika nwowim. Iriig.

Adi Komii siir naeyiu ieya mi yiu biyeyin niksisaei ikin

4 ¹Ti kariir nomiiyauim, iikam whiekakim yipiki yai bibiyeyim niksisaeyim sim nanaakninkii haiginiuwiyim hinda tinda bīdi yinoopkiyim. Mi iikamim kimiiram niti mi sima ha nini boini, yim sima Adi Komii siirgim mi kima wi kipi niki anka aingwo tībmii kiin simiir yai aiiramim. Biiyin kima simiir tiki kinankiu mi sibgu sibgu tiki kigimoki ti simiir hir nwokaiyin yio Adi Komii krīmiir Wanin siir naeyiu ieya piyamisi owin, iyie uridyiu biyieki piyami owin. ²Mi kima wa kigninokninkinkii, Adi Komii siir naeyiun siya ini haniin simiir kwoin imiir kwirii idwokaii. Mi yipiki ha boini, Jisisin yio Adi Komii siir kwoinkar naingwo imbingikin, tiriir nitamin mi siya ini inkam kiingikiinar yauni oniyin mi kima wi haniingi ninokninkinkii, Adi Komii siir naeyiun ini ti inkam iir nwokaiyin. ³Mi yipiki Jisis Kraiis siirin hiniina boin karamae nwoke mi ti kwoinin siir kwirii idwokaiyin yio Adi

Komii siir tani. Niingaka. Tiki kwoinin yio Krai siir sau omomkin. Kima bidiyar iki inokninkinim hiniin siya wi sipi niti. Mi tariinanin siya ti nu iir bidi yauni oniyin.

⁴Ti kariir nomiyauim kara naingwokwonanaeyim, wim kima Adi Komii krimiir Wanin siirgin mi wim kima ti iikam biyie biyeyim simiir bidi ikwowaisiigim. Dimusi rani, yipiki wari kimiir kwoinaw kwirii idwokaiyin siyairgin yipiki ti iikamim nuanim simiir kwoinaw kwirii idwokaiyin yipiki niksisaeyin siir nikwowaisiyyin bi. ⁵Mi ti iikamim yipiki niksisaeyim yim nu tiran ima yim sima Adi Komii siir tani. Mi ti dimin taeminim sima boiniyim yim nu tirankim mi ta hiriinan sairsika tiki iikamim nuanim simiir asi wakaei mi simiir asi wakaeyokna api. ⁶Mi nim krima Adi Komii siirgin. Mi ti iikam yipiki Adi Komii siirim sima iinokiinokin krimiir yayim simiir simiira wakaenanaeikim. Mi ti iikamim yipiki Adi Komii siir kamaeyim yim sima krimiir yay imiir bi swoki wakaeikim. Niingaka. Mi ti hiriinan siyiuin nim krima ina ninokninkinim ti iikamim yipiki Adi Komii siirgisiir naeyugakim mi ti iikamim yipiki Setani niksisa naeyiuin si nwokaiyim simiirin ina mi inokninkinim. Iriig.

Adi Komii sasairgin naingwokwonanaeyin

⁷Ti kariir nomiyauim kara naingwokwonanaeyim, kima irni nwrniyam daingwokwonanae. Mi ti siyiu hiriinanin irni nwrniyam krima naingwokwonanaeyin yio Adi Komii siirgisiirgin. Mi yipiki siir nomiyau iiram naingwokwonanae yio Adi Komii siir yinisimkin mi yio siya siirin ina sibgu inokninkinin. ⁸Adi Komii siyairgin naingwokwonanae sair bwamkibwamin. Mi ta hiriinan sairsika, yipiki siir nomiyau imiiram naingwokwonanae kamae nwowi mi yio tari Adi Komii siir bi ninokninkin. ⁹Adi Komii siya krimiir bidi yiisiimauuin hiniin, siya krimiiram naingwokwonanaeikin. Mi siya siir yinisim nwrkinwiruwan asi nikropकिन mi siya krimiir whinkinsiis haiginiuwam nitkin mi ta hiriinan sairsika krima wi wadie saika asi nwoyokiyokiikaeyami. ¹⁰Mi naeyiuin naingwokwonanaeyin siir bwamkibwamin yio si. Ta krima naingwokwonanaeya Adi Komii siiram saeya rani. Mi krimiiram bi siyar naingwokwonanaekin mi siya siir yinisim iirin ina yikropkiyin mi ta hiriinan saekisaeyairga Adi Komii siya krimiir dimin biyie imiirin siirsiyar haiyoprimdiyiumiigikin.

¹¹Ti kariir nomiyauim kara naingwokwonanaeyim, ti dimin taemin hiniinim yim krimiir niisiimauugim hiniin Adi Komii siya krimiiramar naingwokwonanaeikin mi nim krima wi irni nwrniyam mi aingwokwonanaeyim. ¹²Adi Komii siirin inkamki bi swoki kigmiminkin. Mi krima irni nwrniyam naingwokwonanae mi ti Adi Komiiyin ti krimiir kwoinaw kwirii idwokaiyin mi krima wi siiram

naingwokwonanaei mi krīma wa ninoknīnkini siya ini krimiiramar naingwokwonanaei iskiyīn.

¹³Krīma ina ninoknīnkini krīma mi Adi Komii siya krīma ini kwoin whīruwar nwowiskiyim. Dimusi rani, biīya siya siir naeyauin krimiir niki hauugikin mi siya ini krimiir tīr nwokaiyīn. ¹⁴Nim krīma Jisis siir bidi kīgim mi krīma ta yai aiir asi boīnmimauwi. Adi Komiiyīn siir Adin siir yinisim iīrin siya nīkropkikin iikam krimiir nanmaiwarkainam mi ta hiriinan saīrsika siya iikam whiekakim nu tiranim simiir asi whīnkīnsiis haiginiugin dimin biyeyim ti nuin siirim simiir kirie aiir kīntiokiiyam. ¹⁵Mi yipiki ha boīni Jisis siya Adi Komii siir yinisimkin mi ti inkamīn siya mi Adi Komii siya sowa wi kwoin whīruwar nwowi. ¹⁶Adi Komii siya siyaīrgin naingwokwonanae saīr bwamkībwanin mi nim krīma ina ninoknīnkini siya krimiiramin ina naingwokwonanaeyīn. Mi ti iikamim yipiki iikam nhirmiyam naingwokwonanaeyim, yim sima wi Adi Komii saika kwoin whīruwar nwoyokiyokiikaeyami. ¹⁷Adi Komii siya hiniina naingwowi, nim krīma iikam imiiramin nhami nhami naingwokwonanaei rani. Mi krīma hiriinan tiri mi ti dimin taeminim ti tariinan krīma tirim yim ini ti dimin taeminim biīya Krai siya tirim ini simiir hiriinan ywowim. Mi krimiirin wi Adi Komii siya whīnkīnsiis haiginiuwi hindara naingwokwonanae iskiyim. Mi mhōiīya iīya Adi Komii siya hidi iikam imiir mi nim krīma wi nidid rani. ¹⁸Mi yipiki hiniina ninoknīnkini Adi Komii siya siiram naingwokwonanaei mi siya wi nidid rani. Mi yipiki Adi Komii siirgisīiram naingwokwonanaei mi siya wi dimin taemīnsi nidid rani. Inkamīn dimusi nididi? Siya dimusi nidid rani, siirīn wi Adi Komii siya nonkwobumbunīnkini ti dimin biyie biyeyim yipiki biīya siya tirim. Mi yipiki Adi Komii siirsi nididi mi yio tari Adi Komii siya mi iikam ima simiiramin sibgu naingwokwonanaei rani.

¹⁹Nim krīma Adi Komii siya mi iikam ima simiiram naingwokwonanaei. Dimusi rani, siya biigibiīyīn krimiiramar naingwokwonanaekin. ²⁰Mi inkamīn nwirki hiniina boīni siya Adi Komii siiram naingwokwonanaekin mi siya siir nomiiyau inika pi io nwowi mi yio ti inkamīn pi nīksisaekin. Iikam krīma Adi Komii siir bi swoki kīgimimīnkim. Mi yipiki siir nomiiyau iīr kigi mi siiram naingwokwonanae karamae nwowi mi siya Adi Komii siiramin wi paniina naingwokwonanaei yipiki siya kīg karamae nwowin, ha? Mi inkamīn siir nomiiyauin saika nomboboin ae karamae nwowi mi yio wi Adi Komii siiram naingwokwonanaei rani. Niingaka. ²¹Jisis Krai siir yaiya ya krimiir bidi hauuwa, krīma saīr wakaeyoknam. Mi yipiki Adi Komii siiram naingwokwonanaei mi siya iriipi hiriinan siir nomiiyauin siiram warar timi aingwokwonanae. Iriig.

**Iikamim yipiki Adi Komii siir yai aiir wakaeyokna apiyim
dīmīn biyie biyie imiirin wi sima nīkwowaisii**

5 ¹Mi yipiki hiniina naingwo tībmiī kīni Jisis siya Kraiskīn, yipīkin
Adi Komii siya nīkropkiyīn mi yio ti inkamīn Adi Komii krimiir

Wanin siir yinisimkin. Mi yipiki Ad iiram naingwokwonanaei mi siya siir yinisim iiramın wara timi aingwokwonanae. ²Mi krıma Adi Komii siiram naingwokwonanaei mi siir yai aiir wakaeyokna api mi krıma wi hainii ninokninkini nim krıma siir yinisim iiramar naingwokwonanaeikim. ³Mi Adi Komii siya naingwokwonanaeiya saiir bwamkibwamin ya hiniinga krıma ti dimin taemin whiekakim siya hauuwim krıma tiram simiirar wakaeyokna iski. Mi ti diminim siya boinanım krıma tiram, yim wi hikak krimiir nwowaigniu rani. Niingaka. ⁴Mi siyiuin ti iikamim yipiki Adi Komii siir ninokninkin karamae nwowim sima nwoyiyin yio wi dig nwo rani, Adi Komii siir yinisim imiir nikwowaisiyim, simiir kirieya ini ti simiir siyu bibiyeyim simiir kou ywowa. Dimusi rani, nim krıma Adi Komii siiram naingwo tibmii kiinikim mi krıma wi digar nwowi ti siyiuin ti iikamim yipiki Adi Komii siir ninokninkin karamae nwowim sima nwoyiyin siir nikwowaisii iuguskiyim. ⁵Mi wi dig nhinga nwowi ti siyu hiriinanin ti iikamim yipiki Adi Komii siir ninokninkin karamae nwowim sima nwoyiyin? Mi tiriiginim yipiki hiniina naingwo tibmii kiiniyim Jisis Kraıs siya Adi siir yinisimkin, yim wi digar nwowi. Iriig.

**Adi Komii siya bidi sibgu anaakninkii
haiginiugiyim Kraıs siir dimin taeminim**

⁶Yio Jisis Kraıs sasaıgin ti inkam nwıruwan ti nu iir niuunaiiniyin. Mi siya op ha baptaisin mi mhoiıya siya ina yaonamin paeyin hiiniya nıriıninkinin siir, siir nhie aeya naokiınaiiniyam. Mi iıya siya ti nu iir niuunaiiniyin, siya minam niuunaiinikın siir nhie aeya mi siir op aeya sowar naokiınaiinisowim. Adi Komii siir naeyiuin siyairgin dimin taeminim simiir bwamkibwamin mi krimiirin siyar niisiımauugin hiniin Jisis siya Adi Komii siirgisiir yinisimkin. ⁷Dimin whoımuwam sima simairgin krimiir niisiımauuyokiyokıiyamiyim hiniin. ⁸Adi Komii siir naeyiu ieya mi op, ta opa Jonki si baptais haiginiıwa Jisisni mi nhie aeya mi ta iıya biıya Jisis siya naonama mi siir nhieya ha naokiınaiiniıya saiir ti swoki aingwowoknaki. Mi ti dimin whoımim yim dimin whıruwan siirarar niisiımauugin Jisis siya Adi Komii siir yinisimkin. ⁹Nim krıma yayim inkamki boinim krimiir simiir wakaeyim mi krıma ini simiirar wakaeyokna apim mi krıma ti yayim Adi Komii siya boinimauuım siir yinisim iir simiir wakae. Dimusi rani, siir yayıa ini iki inkami yayim simiir haıbura. ¹⁰Mi yipiki Adi Komii siir yai imiir wakaeyokna api mi siir kwoınin pa ninokninkinkii ta Adi Komii siir yayıa ya kaimwowaırga, ya saeya hiniına boınka, Jisis siya kariir yinisimkin. Mi yipiki ti Adi Komii siir yai imiiram naingwo tibmii kiın karamae nwowi mi ti yayim yipiki biıya Adi Komii siya boinim siir yinisim iir simiir wakae karamae nwowi mi yio ti hiriinan inkamin ti hiriinan boiniyin yio Adi Komii siir nıksisaei. ¹¹Ti yayim yim Adi Komii siya boınkikim krimiir. Siya krimiirin bidiyar whinkinsis haiginiuwın mi krıma wi inıgak

saikar nwoyokiyokiikaeyami. Siya krımıirin ta hiriinan saiirsi whinkinsiis haiginiugin ta siir yinisim iir siya nikropkiya saiirsi. ¹²Mi yipiki kwoin whiruwa Kraisiiram nwowi, yio wi hiriyar nokwoyokiyokiikaeyami. Mi yipiki hiriinan tir karamae nwowi, yio wi niinga nwowi. Iriig.

**Krımı hiniina ninokninkini krımıir inigin wi omwaiyar
hiriyar nwoki waiyoyokiyokiikaeyamim**

¹³Ta yokwowa kara winkika dimusi rani, wim kima iikamim yipiki Adi Komii siir yinisim iir wakaeyokna apiyim kima dinokninkin hiniin, wim kima wi inigak hiriyar nwoyokiyokiikaeyami. ¹⁴Ya dimusi rani, ti hiriinan siyiun krıma wi diminam Adi Komii siir sriisi nidid rani. Nim krıma ina ninokninkinim iya krıma Adi Komii siiram srii diminam yipiki siir kwoin iir wakaeyokna apiyim siya krımıir yai imiirin wa wakaei. ¹⁵Nim krıma ina ninokninkinim iya siya ti dimin taeminim krıma sriigiyim siiram simiir wakaewiniyin mi krıma pa ninokninkinkii krıma simiirin wa haii.

¹⁶Mi yipiki siir nomiyau iir kigi siya dimin biyeyin yipiki paeya nami omin siir nam karamae nwowiyn siir tiri mi siya Adi Komii siiram srii mi siirin wi siya whinkinsiis haiginiuwi mi ta hiriinan saiirsika siya wi inigak hiriyar nwoki sibgu oyokiyokiikaeyamim. Mi ti inkamin siya dimin whir tiri mi siya wi paeni omin siir nami. Mi yipiki ti hiriinan tiri, yio wi paeya nami omin siir nami. Adi Komii siiramın ti hiniin inkamin dimin biyeki naokingugunankaiyin siiram kipi srii. ¹⁷Dimin taemin kasa rani, yipiki iikam ima tirim Adi Komii siir yai imiir kikinwaimwaisiyyim mi dimin taemin biyie biyeyim sima tiriyim yim wi Adi Komii siir tir tani io siya nwowam mi sima wi ta hiriinan saiirsi nam tani paeni omin siirin.

¹⁸Nim krıma ta saiirin ina ninokninkinim yipiki Adi Komii siir yinisim nwowi siya wi dimin biyie hiriyar tiriyokiyokiyam tani. Mi ti hiriinan inkamin siirin Adi Komii siir yinisim ieya kigriraowi mi ta hiriinan saiirsika Setan siya wi siir tirbu rani.

¹⁹Nim krıma ina ninokninkinim nim krıma Adi Komii siirgim mi ti iikam whiekakim ti nu iir nwowim, Setanin yio ini simiir kigriraowan inkam ywowin mi yim sima wi siir wakaeyokna api.

²⁰Krıma ina ninokninkinim Adi Komii siir yinisimin yio bidiyar yitin krımıir whinkinsiis haiginiuwam mi ta hiriinan saiirsika krıma Adi Komii krımıir Wanin kiingikiinin siir asi ninokninkini yaeya Adi Komii nwir karamaeka. Krıma ini Adi Komii siir yinisimin Jisis Kraisi ini saika yamasuswin Adi Komii nwirkinwiruwan sasairgin mi siya ina nwowin mi krımıirin siyar whinkinsiis haiginiuwi mi ta hiriinan saiirsika krıma wi asi nwoyokiyokiikaeyami inokininokin.

²¹Ti kariir nomiyauim kara naingwokwonanaeyim, kima ti tidiyuim kamkim sim nikrimtio kuuwiyn uruwai siyaowainan yipiki iikamkim sim hainaniyim simiirsiyin aru dwo. Iriig.